

Celebracion di 10 aña di festival di canto dedica na Bernadina Growell-Kock

Den fin di siman, na Centro di Bario Brazil, a tuma luga e di 10 edicion di Festival di Canto dedica na nos Mama di Cultura, Sra. Bernadina Growell-Kock. E festival, cual ta honra e legado cultural y musical di Bernadina, a uni talento local, emocion y patriotismo den un ambiente di gran inspiracion y alegria.

Den su discurso di apertura, Sr. Mariano Bermudez, vicepresidente di e Fundacion, a expresa gratitud na pueblo y a recorda cu e aña aki ta un momento historico:
10 aña di Festival di Canto
15 aña di Nos Caya Bernadina
15 aña di Parada Cultural

Durante un rueda di prensa lo wordo anuncia e participacion den e gran Parada Cultural cu su tema nobo, y presentacion di proyectonan futuro pa sigui promove e identidad cultural di Aruba. E festival a resulta un exito rotundo cu participacion di 22 cantante y 8 agrupacionnan tipico, tur cu un presentacion cu a lanta publico y a pone nos tradicion musical den prome plano.

Un momento sobresaliente tabata e categoria “Propio Composicion”, introduci den e edicion aki pa stimula creacion nobo di cancionnan dedica na memoria di Bernadina.

Aki bou ta e resultado oficial: Ganador Absoluto – Propio Composicion:

Raquel E. Lampe cu e cancion “Mosa di nos alma”, un obra di compositor Jhon Freddy T. Montoya, cu areglo di Danny Koolman, acompaña pa Agrupacion Tipico Stima Mi.

Segundo Luga:

E duo hubenil Whitney Nin & Ashanti Zimmerman cu e cancion “Mama ta un Pilar”, di compositor Jhon Freddy T. Montoya, aregla pa Johnny Scarbaay, acompaña pa Grupo Tipico Arubiano.

Tercer Luga:

Angelo Koolman, compositor y cantante di su mes cancion, acompaña pa Frank Croes y su Tipico Pegasaya.

Tur esakinan tabata composicionnan nobo cu ritmo di tumba, pone den escena e tradicion musical autentico y



vibrante di Aruba.

Den e categoria di Cancion Existente, tabatin igual nivel halto di talento y emocion: Ganador Absoluto – Cancion Existente:

Indra Stamper cu e cancion “Indjan di Aruba”, acompaña pa Agrupacion Tradicion Musical.

Segundo Luga:

Ryan Sy, hoben talentoso, cu e cancion “Pilar”, acompaña pa Grupo Colegio Arubiano.

Tercer Luga:

Hellen Arends cu e cancion “Un Soño”, acompaña pa Tipico Alegria.

Tur e tres cancionnan tabata composita originalmente

pa Sra. Bernadina Growell-Kock, y su letra y melodia a logra emociona y inspira e publico presente.

Ademas, den marco di e celebracion di 10 aña di e Festival, a wordo otorga dos Premian Special di Trahe Folklorico, reconociendo e miho presentacion visual y cultural tanto pa dama como pa cabayero.

E premio pa Cabayero cu Trahe Folklorico mas resalta a ser otorga na Sr. Jhon Freddy T.

Montoya, ken, ademas di su vestuario emblematico, a toca e curazon di e publico cu su interpretacion cu hopi sentimiento di e cancion



“Recuerdo” di Don Ramon Krozendijk, acompaña magistralmente pa Grupo Stima Mi.

Pa categoria di Dama, e homenahe a bay pa Julienne Schwengle, cu su interpretacion di “Di Dia cu M’a Conoce Bo”, un tributo inolvidabel na nos Mama di Cultura Aruba, acompaña pa Tipico Alegria.

Pa finalisa, e Premio di Mas Popular, escogi pa voto di e publico presente, a ser otorga na Indra Stamper cu su presentacion vibrante hunto cu Agrupacion Tradicion Musical.

Mester resalta e excelente participacion di e hobennan Arubiano, cu curazon y en-

trega a pone nan talento na disposicion di nos cultura. Masha pabien na tur participante, cantante, compositor, agrupacion y coristanan pa un presentacion inolvidabel.

Un palabra special di felicitacion na tur miembro di Fundacion Bernadina Growell Kock, cu entrega y dedicacion a logra e meta di e festival: honra nos Mama di Cultura y preserva su legado.

Departamento di Cultura Aruba ta felicita y gradici tur organisadornan, participante, y colaboradornan pa un festival cu definitivamente a logra su obhetivo: mantene bibo e legado di Bernadina Growell Kock, y honra e alma musical di Aruba.